

李修之醫話精華

李修之（用粹）又號惺庵松江人學養至深
見理獨明爲人治病投之所向無不合度嘗詳
述病原治法選錄應效方劑著証治彙補一書

李修之醫目次

傳差	一
中風	二
暑熱	四
血症	五
泄瀉	七
痺	一〇
哮喘	一一
諸痛	一二
腹脹	一四
調經	一六
胎產	一七

李修之醫話精華

上海秦伯未編纂

普甯方公溥參校

傷寒

徐敬山傷寒鬱熱過經不解。愈後復譫語神昏。刺高胎黑。耳聾如愚。六脈洪大。此陽明胃熱血化爲斑之狀。仍燃燈照其胸腹。果紫斑如豆大者。朗如列星。但未全透於肌表。宜清胃解毒。使斑點透露。則神清熱減矣。用竹葉石膏湯二劑。壯熱頓退。斑勢掀發。但昏呆愈甚。厲聲呼之。亦不覺醒。全無活意。惟脈息尙未斷絕。俱云死矣。余復診其脈。兩手皆在。不過虛微耳。蓋此證始因胃熱將腐。先用寒涼以解其客熱。今邪火已退。正氣獨孤。故兩目緊閉。僵如死狀。急用補胃之劑。以醒胃脘真陽。生機自回也。卽以生脈散合四君子湯一劑。至夜半而兩目能視。乃索米粥。以後調理漸安。

妻祖黃含美。庚辰會試。患傷寒極甚。適其時家君薄遊都門。乃與診治。舌黑刺高。壯熱妄語。神思昏沈。奄奄一息。此爲邪熱內盛。亢陽外灼。臟腑燔焚。血遂沸騰。斑將出矣。遂用生地黃連元參麥冬丹皮知母甘草。一劑而斑現。再劑而神清。三劑而舌刺如洗矣。

燕京禮垣房之麟。患傷寒五日。病勢困殆。伊親在太醫院者七人。莫能措手。延家君治之。脈人迎緊盛。右關洪大。神思若狂。舌胎微黑。此邪熱拂鬱。神思昏憤而如狂。亢陽煽熾。火極似水而舌黑。炎炎蘊隆。將成燎原。若非涼血。火將焚矣。視其胸腹。果有紅斑。遂用化斑清火。一服頓愈。

中 風

分鎮符公祖恭人。形體壯盛。五旬手指麻木。已歷三載。甲辰秋。偶感悲怒。忽失聲仆地。痰潮如踞。眼合遺尿。六脈洪大。適予往茸城。飛騎促歸。緣符公素諳醫理。自謂無救。議用小續命湯。俟予決之。予曰。是方乃辛溫羣聚。利於祛邪。

矯於養正。其故有三。蓋北人氣實。南人氣虛。雖今古通論。然北人居南日久。服習水土。氣稟更移。膚腠亦疎。故卑下之鄉。柔脆之氣。每乘虛來犯。致陰陽顛倒。榮衛解散。而氣虛卒中。此南北之辨者一。况中風要旨。又在剖別閉脫。夫閉者。邪塞道路。正氣壅塞。閉拒不通。脫者。邪勝。五內心氣飛越。脫絕不續。二證攸分。相懸霄壤。故小續命湯。原爲角弓反張。牙關緊急。閉證而設。若用於眼合遺尿之脫證。是既傷其陰。復耗其陽。此閉脫之辨者二。又風爲陽中陰。氣內應於肝。肝爲陰中之陽臟。外合於風。悲怒太過。火起於肝。膽內火外風。猖狂擾亂。必挾勢而乘脾土。故痰涎洶湧。責脾不統攝。腎不歸藏。滋根固蒂。尙恐不及。若徒事發散。是爲虛虛。此真似之辨者三。靈樞所謂虛邪遍客於身半。其入深者。內居營衛。消衰則真氣去。邪氣猶留。發爲偏枯。端合是證。當法河間東垣用藥。保全脾腎兩臟。庶可回春。乃以六君子加黃耆白芍桂枝鈎藤竹瀝姜汁。服二劑。惡症俱減。脈亦收斂。但聲啞如呆。此腎水衰耗。心苗舌槁。至更餘後。火氣下行。腎

精上朝方能出音。遂改用地黃飲子。服至十五劑。大便始通。堅黑如鐵。雖有聲出。狀似燕語。乃朝用補中益氣湯。加麥冬五味以培脾。夕用地黃湯加肉蓯蓉。當歸以滋腎。調理百日。語言如舊。步履如初。但右手不能如前耳。然亦倖賴余之辯也。

暑熱

上洋王邑尊有幕賓張姓者。盛暑發熱。至六七日以來。昏沈不語。面赤兼紫。與水則嘔。大便不通。身難轉側。目閉不語。羣醫束手。皆曰不治。好事者以予名齒及。卽投柬招治。診畢謂王公曰。是病雖危。脈則和順。况身體軟緩。唇吻紅潤。氣息調勻。俱爲吉兆。只因邪熱傳入手少陰經。鬱而不舒。所以面赤昏呆。口噤不語。乃以導赤散。加黃連麥冬佐犀角少許。加竹葉燈心煎成。用刷脚抉開口。徐令灌下。片時覺面色稍退。再劑而開目能視。三劑而語言如舊。後調理而安。

慈溪楊天生館江灣鎮。時值盛暑。壯熱頭痛。神昏發斑狂亂。不畏水火。數人守之。猶難禁止。甚至舌黑刺高。環口青暗。氣促眼紅。譫語直視。迎余往治。余見衆人環繞。蒸汗如雨。病人狂躁。無有休息。尋衣摸牀。盡屬死候。強按其脈。幸而未散。急取筋纏綿。用新汲水。挾開口。鑿去芒刺。卽以西瓜與之。猶能下咽。乃用大桶盛新汲水。放在四圍。并洒濕中間空地。鋪薄席一條。使病人睡上。再用青布丈許。摺作數層。浸入水中。搭病人心胸之間。便能言。頓入清涼世界。六字語雖模糊。亦爲吉兆。遂煎白虎湯。加山梔黃芩玄參與服。半月間。狂奔亂走。目無交睫。藥纔入口。熟睡如死。傍人盡曰休矣。余曰此胃和安睡。不可驚覺。自日中至夜半方醒。其病遂愈。

血 症

徽商吳維宗。年將耳順。忽染吐血嗽痰。晝夜不寧。醫視年邁多勞。誤投參耆。遂覺一綫穢氣。直冲清道。如烟似霧。胸膈隱隱作痛。喘息不能臥下。闔戶悲

泣。轉遣伊姪遠顧蓬門。具陳病概。述維宗得子。尚在幼齡。一旦攫此沉疴。鞠育何人。衷腸慘裂。余憫其懇切。細爲審度。知水虧龍奮。焦灼嬌臟。將見腐肺成癰。所以咳咯不止。蓋金水一氣。水火同源。乾金既可生水。坎水又能養金。惟源流相濟。則離炤無輝。如真水涸流。則相火飛越。俾清虛寥廓之質。成擾攘混濁之氣。況乎甘溫助陽。愈傷其肺。宜壯水之主。以鎮陽光。使子來救母。而邪火頓息也。方以生熟地黃。各二錢。天麥門冬。各錢半。紫苑茯苓貝母。枯苓瓜蘖霜甘草。節各一錢。服兩劑。而烟消霧散。喘息臥穩。以後加減。不旬日而痰嗽俱止。

柯雲甯患吐血。咳嗽連聲。氣喘吐沫。日晡潮熱。服四物。知母黃柏蘇子貝母百部丹皮之屬。病勢轉劇。乞余治之。六脈芤軟。兩尺浮數。知爲陰枯髓竭。陽氣上浮。肺金之氣。不能歸納丹田。壯火之勢。得以遊行清道。所以嬌藏受傷。喘嗽乃發。理應用六味丸加五味。沈香導火歸源。但因脾氣不實。乃先以人參白朮黃耆山萸山藥。各錢半。石斛丹皮茯苓各一錢。五味子二十一粒。肉桂五

分服數十帖。大便始實。改用前方。調養月餘。咳嗽亦愈。

□ 泄 瀉

上洋鄒邑侯子舍。仲夏患泄。精神疲憊。面目青黃。因素不服藥。遷延季秋。忽眩暈仆地。四肢抽掬。口歪唇動。遍體冰寒。面黃肚縮。六脈全無。署中幕賓曉通醫理。各言已見。或議諸風掉眩。法宜平肝。或論諸寒收引。法應發散。議論異同。不敢投劑。延余決之。余曰。脾爲升陽之職。胃爲行氣之府。坤土旺則清陽四佈。乾健乖而濁陰蔽塞。此自然之理也。今泄瀉既久。冲和耗散。所以脾元下脫。脈氣上浮。陰陽阻絕。而成天地不交之痞。故卒然倒仆。所謂土虛則潰也。况肝脾二經。爲相勝之藏。脾虛則肝旺。肝旺則風生。故體冷面青。歪斜搖掬。相因而致也。若誤認風寒之候。而用發表。恐已往之陽。追之不返。宜急煎大劑人參附子。庶爲治本。合署驚訝。見余議論嚴確。乃用人參一兩。熟附二錢。生薑五片。煎成灌下。一二時手指稍溫。至夜半而身煖神甦。能進米飲。後以理中補中調理。

而安。

分鎮符公祖令愛。久瀉肉脫。肢體浮腫。大腹脹痛。便內赤虫。形如柳葉。有口無目。更兼咳嗽煩躁。夜臥不甯。召余調治。符公曰。小女之疾。起於去夏。飲食又不節。淹纏半載。服利水之藥。身腫不減。用參耆等劑。脹悶益增。諒非神手。不能奏功。敢祈一七。以冀回春。余曰。中央脾土。喜燥惡濕。爲臟腑根本。生化源頭。雖云至陰之地。實操升陽之權。盛暑之際。六陽外發。陰寒潛伏。加之浮瓜沈李。飲冷吞寒。使乾陽之氣。鬱坤土之中。所以氣滯化濕。濕化而熱生。濕熱壅滯。轉輸不行。倉廩之精華下陷而爲瀉。久則清陽愈虛。濁陰愈盛。留於中州。則爲腹脹。散於肌肉。則爲浮腫。上乘肺分。則爲咳嗽。况脾爲諸陰之首。肝爲風木之司。濕熱盛則陰虛而煩躁夜甚。肝風旺則遇濕而蟲形生。頭緒雖多。不越木旺土衰之症。治常調脾抑肝。佐以升降清濁。使濕熱去而病當漸愈。疎方用白朮雲苓半夏芍藥黃連肉桂乾薑柴胡厚朴烏梅花椒等劑。調理而安。

張侍川脾泄經年。湯藥遍嘗。大肉盡削。小便枯竭。勢已危殆。余往診之。左脈弦細。右脈虛微。此係乾陽不運。坤陰無權。所以脾傷而破。脘肉脫。肺虛而氣化失調。俾濁陰不降。內滯腸胃。清陽不發。下乘肝腎。由是三陰受傷。而成久泄之症。况人年四十。升陽之氣。與降陰之令。自此相半。今侍川春秋已逾五旬。不思舉其下陷之氣。反以滲利爲用。則失治本之旨矣。况下久亡陰。未有久泄而腎不虛者。若單補其脾。則力緩不能建功。須得溫緩下焦。藥輔其間。俾丹田火旺。則脾土自溫。中州健運。則充和自布。精微之氣。上奉辛金。下輸膀胱。泌別清濁。則小水通於前。大便實於後。可指日而愈也。方以人參黃耆白朮甘草廣皮木香升麻柴胡肉果補骨脂數劑。小水遂通。大便亦實。後以四神丸加煨木香調理而安。

家君治江右太師傅繼菴夫人。久泄不已。脈得微遲。微爲陽衰。遲爲寒甚。斯脾土虛而眞陽衰之候也。蓋脾土虛。非補中則土不旺。眞陽衰。非溫中則寒

不釋乃以四君子加薑桂服二劑而畏寒如故泄亦不減知非土中之陽不旺乃水中之火不升也。水中之火不升無以上蒸脾土故氣餒而不健須助少火之氣方能障土之濕遂以人參三錢白朮五錢肉桂一錢附子一錢數劑漸愈後以八味丸調理而安。

痺

上洋秦齊之勞慾過度每於陰雨左足麻木有無可形容之狀歷訪名醫非養血爲用卽補氣立論時作時止終未奏効戊戌春病勢大發足不轉舒背心一片麻木不已延余治之左脈沉緊右脈沉澹此風寒濕三氣雜至合而爲痹其風氣勝者爲行痹濕氣勝者爲著痹寒氣勝者爲痛痹着痹者卽麻木之謂也明係濕邪內著痰氣凝結鬱而不暢發爲著痹須宣發燥濕之劑加以引使之品直至足膝庶濕痰消而火氣周流也方以黃耆蒼朮桂枝半夏羌活獨活防己靈仙數劑其病如失終不復發若以齊之多勞多慾日服參耆壅瘀隧

道外邪焉能發越。而病安從去。

德州都諫王介清。丁內艱。特患左脇頑痹。足腿麻木。按摩片時。少堪步履。服清火消痰。補氣活血。病勢不減。後服滿入京。邀參君診視。見伊腎肝脈虛。斷爲腎虛不能生肝。肝虛不能榮血。水虧血耗。經隧枯澇之症。先以四物湯加秦芫石。斛牛膝。萎蕤。不數劑而脇痹頓除。後服腎氣丸一料。永不復發。

哮喘

秦商張玉環。感寒咳嗽。變成哮喘。口張不閉。語言不續。吟呬有聲。外聞隣里。投以二陳枳桔。毫不稍減。延余救之。診其右手寸關。俱見浮緊。重取帶滑。斷爲新寒外束。舊痰內搏。閉結清道。鼓動肺金。當以三拗湯。宣發外邪。湧吐痰涎。爲要。若畏首畏尾。漫投膚淺之藥。則風寒閉固。頑痰何由解釋。况經曰。辛甘發散。爲陽。麻黃者。辛甘之物也。稟天地輕清之氣。輕可去實。清可利肺。肺道通而痰行。痰氣行而哮喘愈矣。乃煎前方與服。果終劑而汗出津津。一日夜約吐痰

斗許哮喘遂平。二年因不忍口。復起前症而殞。

協鎮王公生長薊北。腠理閉密。癸卯秋謁提臺梁公于茸城。乘涼早歸。中途濃睡。覺後惡寒發熱。緣無宿病。自念體強。不須調養。過食葷腥。日增喘促。氣息聲粗。不能臥倒。更覺汗出津津。語言斷落。不能發聲。延余商治。六脈洪滑。右寸關尤汨汨動搖。以脈合證。知爲痰火內鬱。風寒外束。正欲出而邪遏之。邪欲上而氣逆之。邪正相搏。氣湊於肺。俾橐籥之司。失其治節。清肅之氣。變爲擾動。是以呼吸升降。不能宣通。氣道奔迫。變爲肺鳴。一切見症。咸屬風邪有餘。肺氣壅塞之證也。若能散寒祛痰。諸病自愈。乃用三拗湯加橘紅半夏前胡。一劑而痰喘緩。二劑而胸爽臥安。夫以王公之多慾。誤認丹田氣短。用溫補之劑。則膩固膚腠。客邪焉能宣越。頑痰何以渙散。故臨證之頃。貴乎諦審也。

諸痛

大學士徐立卮夫人。患胃脘病。先以氣治。次以食治。繼以火治。劑多功少。

甚至昏憤。良久復甦。延家君救療。曰夫人尊恙。非氣也。非食也。亦非火也。由勞碌過度。中氣受傷。脾陰弱而不化。胃陽衰而不布。陰陽既虛。倉廩壅滯。轉輸既弱。隧道失運。所以清濁相干。氣血相搏。而作痛也。若過用消導。則至高之氣愈耗。誤投苦寒。則胃脘之陽愈傷。爲今之計。非補不可。古語雖云痛無補法。此指邪氣方面者言也。今病勢雖甚。而手按稍止。脈氣雖大而重按稍鬆。則是脈證俱虛。用補何疑。卽以香炒六君子湯。一劑而昏憤定。痛亦止矣。

內鄉令喬殿史次君。自幼腹痛。諸醫作火治。氣治。積治。數年不效。後以理中建中相間而服。亦不效。六脈微弦。面色青黃。余曰。切脈望色。咸屬木旺凌脾。故建中用以建中焦之氣。俾脾胃治而肝木自和。誠爲合法。宜多服爲佳。復用數劑。益增脹痛。殿史再延商治。余細思無策。曰。令郎之痛。發必有時。或重於晝。或甚於夜。或飢餓而發。或飽逸而止。皆治法不同。殿史曰。是病方飲食下咽。便作疼痛。若過飢亦痛。交陰分則貼然。余曰。得之矣。向者所用小建中。亦是從本

而治。但芍藥酸寒。甘飴發滿。所以服之無效。但緣過飢而食。食必太飽。致傷脾胃。失其運用之職。故得肝旺凌脾。經所謂源同流異者也。今以六君子湯加山查麥芽助其健運之職。而利機關。令無壅滯之患。則痛自愈也。服二劑而痛止。所以醫貴精詳。不可草草。

一婦向患左脇疼痛。服行氣逐血之劑。反加嘔吐。甚至勺水難容。脈左沈右洪。明係怒動肝木。來侮脾陰。過投峻藥。轉傷胃氣。致三陰失職。倉廩無由而化。二陽衰憊。傳導何由而行。所以下脘不通。食泛上湧。斯理之自然。無庸議也。方以異功散加白芍肉桂。於土中瀉木。并禁與飲食。用黃耆五錢。陳倉米百餘粒。陳皮生姜三片。用伏龍肝水三碗。約煎一半。飢時略進數口。三兩日後。方進稀粥。庶胃氣和而食自不嘔也。依法而行。果獲奇効。

腹脹

參戎王麗堂夫人。信佛長齋。性躁多怒。腹脹累年。歷用湯丸。全無奏効。余

脘時腹大臍突。青筋環現。兩脇更甚。喘滿難臥。此係怒氣傷肝。坤宮受制之證。前醫徒知平肝之法。未明補肝之用。所以甲胆氣衰。冲和暗損。清陽不升。濁陰不降。壅滯中州。脹勢更增。殊不知肝木自甚。肝亦自傷。不但中土虛衰已也。治當調脾之中。兼以疎肝之品。使木氣條達。不鬱地中。而坤土自能發育耳。疎方用白朮朮各錢半。白芍廣皮香附茯苓各一錢。肉桂木香生薑皮各五分。服後頓覺腹響脹寬。喘平安臥。後加人參調理而全瘥。

文學包曰。愈食蟹腹痛。發則厥逆。逾月不已。來邀診告余。遍嘗諸藥。始則平胃二陳。繼則桂姜理中。一無取效。反增脹痛。余曰。諸痛不一。投治各殊。感寒痛者。綿綿無間。因熱痛者。作止不常。二者判若霄壤。宜審痛勢。有時脈帶沉數。其爲火鬱無疑。雖曰食蟹而得。然寒久成熱。火鬱於中。熱極似寒。厥冷於外。此始末傳變之道。先哲垂論。昭然可考。奈何執泥虛寒。漫投剛劑。是以火濟火。豈不難哉。以四逆散加酒炒黃連一劑而愈。